

REZOLUCIJE Reakcije na stavove Kongresa SAD

Vašington ne vjeruje Briselu

Američki analitičar Kurt Basiner ističe da Vašington nije zadovoljan planovima Unije • BiH ne ide u pravom smjeru • Pozitivne reakcije Sarajeva

Rezolucija američkog Kongresa o BiH i posjeta potpredsjednika Džozefa Bajdena (Joseph Biden) pokazuju da Vašington smatra kako BiH ne ide u pravom smjeru, izjavio je jučer za „Dnevni avaz“ Kurt Basiner (Bassuner), analitičar Centra za demokratizaciju.

On je istakao važnost Rezolucije o BiH koju je usvojio Kongres, ističući da se u njoj prvi put zvanično govori o mogućem imenovanju specijalnog predstavnika SAD za BiH i region.

Snažniji angažman

- Sve to jasno govori da u SAD postoji shvatanje da stvari u BiH ne idu u pravom smjeru i to postaje sve važnije pitanje. Kongres poziva administraciju Baraka

Bajden prvo dolazi u BiH

Basiner ističe da ima mnogo različitih informacija o Bajdenovoj posjeti, ali da se čini pouzdanim vijest da će prva stanica u njegovoj turneji ovim regionom biti upravo Sarajevo i BiH.



Bajden: BiH je ključna

- To je potvrda ove promjene u fokusu. Ranije bi to sigurno bilo Kosovo, ili možda Srbija, ali sada je sve jasne da je ovdje BiH ključna za cijeli region - kaže on.

Obama (Barack) da imenuje specijalnog predstavnika. To će značiti snažniji angažman u BiH, jer SAD, očito, nemaju pouzdanja u način na koji EU sada planira korake u BiH - kaže Basiner.

Prema njegovim riječima, iako nije obavezujuća za administraciju, ova rezolucija imat će snažnog odjeka na politiku Bijele kuće i Stejt departmenta.

- Svaka rezolucija u određenoj mjeri je produkt lobiranja, ali je tu pitanje ko ima jače argumente.



Basiner: Moguće imenovanje specijalnog izaslanika za Balkan

Šta sadrži Rezolucija

- BiH mora što prije izgraditi efikasnu državnu vlast koja može ispuniti obaveze i uvjete za integracije u EU i NATO
- Svaki dogovor o ustavnoj reformi mora imati za osnov Dejtonski sporazum, uskladiti ga s ljudskim pravima, podstaci ekonomski razvoj, uključiti javnost i biti u skladu s evropskim putem

- SAD trebaju nastaviti pomagati BiH u izgradnji efikasnih agencija za provođenje zakona te sudske vlasti
- EU treba pažljivo razmotriti pitanje daljnjeg smanjenja broja trupa EUFOR-a
- OHR ne može biti zatvoren prije potpunog provođenja pet ciljeva i dva uvjeta

Očito je da postoje jaki argumenti, koje je Kongres prihvatio, da se u BiH uradi ustavna reforma, napravi efikasnija i funkcionalnija vlast, a da se sve to dogodi uz snažniju ulogu SAD - navodi Basiner.

Puni rad

On smatra da je ključno pitanje imenovanje specijalnog izaslanika, osobe koja bi, kako kaže, puno radno vrijeme posvetila ovom regionu u BiH.

- Mnogo je ljudi u administraciji, poput Bajdena ili državne tajnice Hilari Klinton (Hillary Cli-

Dodik: Protiv miješanja

Premijer RS Milorad Dodik izjavio je jučer da poštuje pravo američkog Kongresa da donosi rezolucije o BiH, ali da je protiv bilo kakvog miješanja stranaca u ustavne promjene u BiH. Istakao je da još nije upoznat s detaljima Rezolucije.

- Ustavne promjene u BiH naš su problem i od nas će zavistiti hoće li njih biti ili ne - kategoričan je Dodik.

nton), kojima BiH nije novost. Ali, SAD nisu same i mora postojati neko ko će na dnevnoj osnovi biti u evropskim metropolama i preusmjeriti politiku međunarodne zajednice u Bosni i Hercegovini i zapadnom Balkanu, koja sada radi po principu autopilota - ističe Basiner.

Usvajanje Rezolucije u Kongresu jučer su pozdravili član Predsjedništva BiH Haris Silajdžić, zastupnik u Parlamentu BiH Adem Huskić i HDZ 1990. T. LAZOVIĆ

Čavić: Promašaj SNSD-a



Čavić: Dodatni pritisci

Predsjednik Demokratske partije Dragan Čavić smatra da je sadržaj Rezolucije „zabrinjavajući, jer vraća BiH u žižu interesovanja, kao uzrok nestabilnosti, i otvara mogućnost za dodatne pritiske“. On ocjenjuje da BiH nema potrebe za specijalnim izaslanikom SAD, a ako se to desi, onda je BiH, zajedno s Kosovom, određena kao „kritični region na Balkanu“.

- Stvoren je povod za pojačano američko prisustvo, a direktna je posljedica, prema meni, pogrešna politika vladajuće koalicije. Kada je u pitanju RS, to je promašaj politike SNSD-a - rekao je Čavić.

Komentar dana

Piše: Almasa HADŽIĆ (almasahadzic@avaz.ba)



Do posljednjeg Bošnjaka

Nastavi li aktuelna bošnjačka politika ovako, mogli bismo izgubiti ne samo institucije države nego i vlastito ime

Bošnjaci su iznova eliminirani iz utrke za jednu od značajnih državnih pozicija. Dogovorom Srba i Hrvata uzeto im je mjesto direktora Direkcije za evropske integracije (DEI), i to uz ponižavajuće obrazloženje da bošnjački kandidat „nije prošao pismeni ispit“.

Prevedeno na jezik svakodnevice, ispada da je „pismeni“ pokazao kako je, bajagi, bošnjačka kandidatkinja za to mjesto, Bisera Turković, „manje pametna“ od Lidije Topić ili nekakve Nevenke Savić!

Uzimanje funkcije direktora DEI-ja iz ruku Bošnjaka samo je jedan u nizu poraza koji u BiH doživljava bošnjačka politika. Naime, sa čela Uprave za indirektno oporezivanje (UIO) samo što nije otkinut direktor, Bošnjak, uzdrmane su Regulatorna agencija za komunikacije (RAK), Agencija za veterinarstvo, Centralna banka... U SIPA-i se ništa nikada nisu ni pitali, u CIPS-u također...

Iako je jučer javljeno da se poništava konkurs za izbor direktora DEI-ja, jer su, napokon, bošnjački članovi Komisije odstupili sa te pozicije, način na koji se krenulo u izbor direktora ove direkcije odražava kontinuitet nesposobnosti bošnjačkih političara, koji po sistemu „čuvaj funkciju do posljednjeg Bošnjaka“ promoviraju godinama SDA i SBiH i njihova prethodnica u vlasti SDP, predvođeni svojim doživotnim vođama.

Niko nema pravo kriviti srpske ili hrvatske političare u našoj zemlji zato što na funkcijama važnih agencija, direkcija ili ministarstava nema Bošnjaka. Naprotiv.

Postavlja se pitanje čime se to bave oni koji nastupaju u ime Bošnjaka i njihove politike.

Dok se prije nekoliko dana dogovaralo i pregovaralo o poziciji prve osobe DEI-ja, političari iz SDA, s pridodatom grupom ilegalaca iz SBiH, sijelili su po privatnim mutvacima zavrćući uši i ruke budućim glasačima na Kongresu SDA i ubjeđujući ih da su oni jedini i pravi „spasioci bošnjačkog naroda“.

I ne samo to!

Trenutna borba za najprofitabilniju bošnjačku firmu u zemlji - SDA, u kojoj se godinama kotila i, nažalost, nakotila cijela divizija nesposobnjakovića, Bošnjake bi, nastavi li se ovako, mogla koštati gubljenja ne samo institucija države nego i vlastitog imena.

Doko NINKOVIĆ / TO JE TO

